



欽定四庫全書



史部
傳記類存目一二

12
130
35

史部



欽定四庫全書總目卷五十九

所錢文
有翰那

史部十五

傳記類存目一

孔子世家補十二卷

永樂大典本

宋歐陽士秀撰士秀廬陵人仕履未詳是書成於
淳祐辛亥大抵據皇極經世以駁史記孔子世家
之譌然邵子精於數學不聞精於史學所書先聖
事蹟亦未必盡確自序又稱慮夫事之精粗隱顯
大小本末錯糅其間而不易見則著年表以提其

學

1112
1380
35

綱列世本以類其族且綴弟子年名於其終於以稽其是非用決羣疑而祛已惑今考永樂大典所載已無所謂年表世本弟子年名者則已非完書矣

孔氏實錄一卷

永樂大典本

不著撰人名氏末一條云大蒙古國領中書省耶律楚材奏准皇帝聖旨於南京特取襲封孔元措令赴闕里奉祀案元措以金承安二年襲封衍聖公此書或即元措等所撰歟首錄歷代褒崇之典凡碑文詔旨皆載

其略末載孔氏鄉官甚詳然敘次頗無體例如首載聖母顏氏及聖配元官氏而孔子以上歷世之事獨不一敘疑或傳寫佚脫非完帙也考明文淵閣書目有孔子實錄一冊永樂大典所載則作孔氏未詳孰是然文淵閣書目傳寫多譌未足盡據今仍從永樂大典之名著於錄焉

孔子論語年譜一卷

編修程晉芳家藏本

舊本題元程復心撰復心字子見婺源人皇慶癸丑江浙行省以所撰四書纂釋進於朝授徽州路

教授致仕給半俸終其身是編以論語各章分隸於孔子年譜之內而又雜採左傳諸事附會之如云九歲見季札觀樂於魯三十五歲從昭公出亾畱齊七年此因笈文而牽合孔子者也又云五十三歲孔子聘於齊執圭鞠躬如也云云此因論語而妄生笈文者也又云六十三歲阨於陳蔡不得已浮海至楚曰道不行乘桴浮於海云云陳蔡之間何由浮海郢都又豈海道可通尤夢藝之語可資笑噓者矣至所分隸之論語以子釣而不綱章

爲三十一歲以子以四教章子所雅言章子罕言章子不語章自行束脩以上章爲三十四歲以八佾雍徹諸章爲三十五歲以君子食無求飽章爲四十二歲道千乘之國章爲四十八歲之類不可殫數均不知其何所據而云然復心師朱洪範友胡炳文雖亦講學之家原不究心於考證然不應繆妄至於如是考篇末辨季本聖蹟圖考之妄本王守仁之弟子元人何自見其書殆明季妄人所爲而傳錄者僞題復心之名歟

孟子年譜一卷

編修程晉芳家藏本

舊本題元程復心撰復心既作論語年譜更取孟子七篇爲編年其以某章爲某年之言謬妄與孔子年譜相等其謂孟子鄒人乃陬邑非鄒國也語極辨而不確亦好異之談蓋與孔子年譜一手所僞撰也考朱彝尊經義考載譚貞默孟子編年略一卷今未見其書然彝尊所載貞默自述一篇則與此書之自述不異一字疑直以貞默之書詭題元人耳僞妄甚矣

闕里誌二十四卷

浙江汪啟淑家藏本

明陳鎬撰孔允植重纂鎬會稽人成化丁未進士官至右副都御史巡撫湖廣允植孔子六十五世孫襲封衍聖公闕里向無志乘僅有孔庭纂要祖庭廣記諸書宏治甲子重修闕里

孔廟成李東陽承命致祭時鎬爲提學副使因屬之編次成志崇禎中允植重加訂補是爲今本以圖像禮樂世家事蹟祀典人物林廟山川古蹟恩典弟子誤述藝文分類排纂而編次冗雜頗無體例

如歷代誥敕御製文贊不入追崇恩典志而另為提綱碑記本藝文中一類乃別增謬述一門均為繁複

孔顏孟三氏誌六卷

兩江總督探進本

明劉濬編濬永嘉人成化中官鄒縣教諭鄒孟子所生地孟廟在焉濬因考證孔顏孟三氏世系以及褒崇諸典彙輯成書先以地圖次以世系年譜次以廟制次以誌事附述聖於卷後而前列提綱一卷則壬子四月紫陽楊與所述東遊記也壬子

為元憲宗二年而濬於壬子下註云元憲宗淳祐十二年紀年既誤而又以宋理宗年號移之於元殊為疎舛即此一端其他可概見矣

孔孟事蹟圖譜四卷

浙江汪啟淑家藏本

明季本撰本有易學四同已著錄是書前說後譜於孔孟事實頗有考核如云孔子未嘗至楚見昭王孟子先至齊而後梁此一二條皆有所見然其餘大抵習聞者多

素王記事

無卷數 浙江朱彝尊家曝書亭藏本

舊本卷首題明浙江嚴州府通判太原傅汝楫校

正則非汝楫所撰卷末楊與東遊記之首又題河

南開封府知府西蜀黃濬輯錄則似為濬之所撰

然不列名於書首而綴於書後體例叢脞殊不可

曉其書則據拾闕里志為之亦茫然無緒蓋當時

書帕之本本不以著書為事者也

案顧炎武日知錄曰昔時入觀

之官其饋遺一書一帕謂之書帕又曰歷官任滿則必刻一書以充饋遺此亦甚雅而鹵莽就工殊不堪讀陸深金臺紀聞亦稱有司刻書祇以供餽贐之用其不工反出坊本下今藏書家以書帕本為最下蓋由於此

夷齊錄五卷

浙江范懋柱家天一閣藏本

明張玘撰玘字席玉石州人嘉靖乙未進士官至

南京戶部右侍郎永平府城西十八里孤竹故城

有清德廟以祀夷齊玘守永平時因蒐輯歷代祀

典諸家藝文編為一帙據目錄原本有圖此本無

之蓋為傳寫者所佚矣

孔聖全書三十五卷

衍聖公孔昭煥家藏本

明蔡復賞編復賞巴陵人卷端自題恩貢出身南

京戶部修職郎不知其為何官也前有自序稱是

書始成就正於兵部侍郎姜廷頤廷頤廼次爲六卷上卷曰經書中卷曰子史下卷曰雜說首卷曰帝王崇重盛典尾卷曰經術經理世務六卷內復條分爲四十卷云云案序稱上中下卷首尾卷祇有五卷不應稱六卷又書三十五卷與四十卷之數亦不合其間鄙俚荒唐龐雜割裂鬼神怪誕之語優伶藝譚之詞無不載入謂之侮聖人可也

尊聖集四卷

浙江范懋柱家天一閣藏本

明陳堯道編堯道里籍未詳嘉靖末官大埔縣教

諭是書分圖像世家事蹟遺澤制敕誤述封事七門多勦襲祖庭纂要諸書無所考證

仲志五卷

兩淮馬裕家藏本

明劉天和撰天和字養和麻城人正德戊辰進士官至兵部尙書提督團營諡莊襄事蹟具明史本傳是編乃天和官總督河道都御史時以濟甯仲家淺有先賢仲子祠故志其建置之由而并及其生平行事大略名之曰令名志崇禎中仲子裔孫于陞等復增損舊本易以今名又繪像列圖於卷

首殊不雅馴

閔子世譜十二卷

安徽巡撫採進本

明張雲漢撰雲漢字倬侯宿州人是編兼及閔子後裔之事故曰世譜首姓氏次里居次特傳列傳次祀典次修葺次官生次世系次遷徙次復業次列女次藝文次家約宿州舊有閔子墓歷代祠祀不絕蓋閔子本宿人春秋時宿屬青州為齊地故家語以為齊人云

夷齊考疑四卷

浙江巡撫採進本

明胡其久撰其久崇德人隆慶丁卯舉人官龍南知縣是編以好事者所傳夷齊世系名字皆據韓詩外傳呂氏春秋而附會之竝以叩馬恥粟等事亦多不實因各為駁正而以先賢論定之語及傳記詩文附其後其議論亦頗博辨然傳聞既久往事無徵疑以傳疑可矣不必盡以臆斷也

夷齊志六卷

浙江巡撫採進本

明白瑜撰瑜字紹明永平人萬歷乙未進士官至刑部左侍郎事蹟具明史本傳此書乃因張玘夷

齊錄損益而成所載視舊錄加詳

道統圖贊一卷

浙江巡撫採進本

不著撰人名氏據卷首樊維城序蓋衍聖公家所刻維城為萬歷己未進士則此書出於明季也即聖蹟圖舊本而前增以伏羲神農黃帝堯舜禹湯文武周公十像後附以顏曾思孟林廟八圖雖以圖贊為名而僅圖前有說數行無所謂贊尤不可解

聖賢圖贊

無卷數 兩江總督採進本

此書摹仁和縣學石刻而不著刊書人姓名首冠以明宣德二年巡按浙江監察御史海虞吳訥序謂像為李龍眠筆高宗於紹興十四年即岳飛第作太學三月臨幸首製先聖贊後自顏回而下亦誤詞二十六年十二月刻石於學又稱舊有秦檜記磨而去之則是石刻之題識非木本之跋語故顏曾二子後皆有高攀龍贊知為近時人刻也考玉海紹興十四年三月十一日己巳幸太學覽唐明皇帝及太宗真宗御製贊文令有司取從祀諸

贊悉錄以進二十四日乙亥御製御書宣聖贊令
揭於大成殿刻石頒諸路州學二十五年又製七
十二賢贊親札刻石頒降焉二十六年十二月戊
午廷臣請頒諸州郡學校從之據此則高宗所撰
宣聖贊刊石在紹興十四年七十二賢贊刊石在
紹興二十五年訥序謂先聖及七十二賢贊俱於
三十六年十二月刊石殊誤所列七十二子較史
記及唐六典所載七十七人少十人增五人與宋
史禮志所載八十二人則少十人與唐宋典制皆

異考玉海卷一百十三又云高宗七十二子贊去
史記公良孺公夏首公肩定顏祖鄔單句井疆罕
父黑申黨原亢顏何公西輿如十一人增申棖蘧
伯玉陳亢林放琴罕申堂續六人遂爲七十二人
與此書人數正合然玉海謂所去十一人內有申
黨而此書仍列申黨玉海稱增申堂續而此書於
申黨之外乃增申棖互相刺謬又如顏子封復聖
公會子封宗聖公皆始於元至順中紹興中作贊
安得標此又考唐開元二十七年贈顏子克公閔

子以下至卜商九人皆侯曾參以降六十七人皆伯宋祥符二年贈閔子以下至卜商九人皆公會參以下七十二人皆侯今書標爵皆襲開元高宗作贊亦不應近廢祥符而遠從唐制疑非宋之原石且李公麟北宋人安得至紹興中作圖其圖畫諸賢多執書卷既非古簡策之制而樊遲名須卽作一多髯像梁鱸字叔魚卽作手持一魚像尤如戲劇其妄決矣

闕里書八卷

兩淮馬裕家藏本

明沈朝陽撰陳之伸補朝陽江甯人天啟閒貢生官池州府學教授之伸海鹽人仕履未詳是編雜採聖賢事蹟湊合成篇每篇各繫以贊詞意膚淺考訂甚疎如越絕書所載子貢事之類皆無所辨正

聖門志六卷

江蘇巡撫採進本

明呂元善撰元善字季可號冠洋海鹽人天啟中官山東布政司都事後殉流寇難其書一卷爲聖門表傳二卷爲從祀列傳三卷爲四氏封典四卷爲禮樂五卷爲古蹟六卷爲東野氏仲氏世系分

子目六十有五蓋元善官山東時所得孔氏諸家譜牒爲詳因輯其宗系述爲此編又取後代理學諸儒附於弟子之後然如魁名內閣無關道統而詳悉臚列別次於從祀諸儒之末殊爲不倫又以諸儒未入祀典者別載擬祀三十五人中如岳飛之精忠不在乎闡明理學錢唐之直諫亦未聞其銓釋聖經乃欲例諸歷代儒林擬議亦爲失當元善書成未梓其子兆祥重加校訂海鹽令樊維城爲刻入鹽邑志林中未附崇禎初曲阜祠祀元善

及四氏子孫等給匾案牘尤雜尤甚

三遷志五卷

安徽巡撫採進本

明呂元善撰蓋因史鶚胡繼先二家舊本爲之訂補未脫彙而元善殉寇難其子兆祥孫逢時乃續成之所載孟廟事蹟每卷之中又各分三子卷凡二十一類每類前爲四言贊一首紀載頗詳而體例標目俱未能雅馴

宗聖志十二卷

浙江汪啟淑家藏本

明呂兆祥撰案曾子祠墓在今山東嘉祥縣嘉靖

中詔錄其後為五經博士世襲求得其裔孫賢粹
居江西之永豐令還嘉祥世守祠廟而歷代崇祀
本未記載未備兆祥始修訂成書卷一為像圖志
卷二為世家志卷三卷四為追崇志卷五卷六為
恩典志卷七卷八為事蹟志卷九至卷十二為藝
文志書成於崇禎中而世家志述其譜系乃載及
國朝康熙中事恩典志內亦載及順治初年不知何
人所增蓋非盡兆祥之舊矣

陋巷志八卷

兩淮馬裕
家藏本

明呂兆祥撰顏子陋巷相傳在曲阜孔廟東北六
百步舊無紀載正德中提學副使陳鎬始為作志
萬歷中御史楊光訓又續編輯之而兆祥是編蓋
因二家之本重為訂定所載皆歷代崇祀典禮而
冠以退省從行諸圖

東野志四卷

浙江巡撫
採進本

舊本題海鹽呂兆祥撰裔孫東野武訂考兆祥與
武皆明末人而是編二卷之末附錄順治康熙中
奏議詳載

聖祖仁皇帝恩授東野沛然為五經博士蓋即沛然因兆
祥舊志稍為續補也前有呂化舜方應祥原序而
粘本盛跋則作於康熙壬寅陳良謨序則作於康
熙丙寅亦續刻所加也考元和姓纂載伯禽少子
別為東野氏則東野氏系出周公更無疑義世承
厥職原非濫膺惟是所敘世譜稱第三代生二子
長暉次晞六代生二子長縉次細其人皆在春秋
以前則兄弟聯名已在應瑒應璩之前又二代東
野宗於田中勝處建祠以安先靈則大夫之廟可

不建於家十六世東野穫字穫德號白雲則別號
已見於戰國二十一代東野質遭楚滅魯負子攜
譜竄於東吳是別族不必於太史而戰國之末尙
延吳祚蓋譜牒之學古來即不一說司馬遷敘五
帝世系往往與載籍牴牾而白居易自敘世系亦
與左傳相違記載異同固不足怪也

孔子年譜綱目一卷

兩江總督
採進本

明夏洪基撰洪基字元開高郵人其書成於崇禎
中於先聖事蹟分年編輯各提其要為綱而詳載

其事為目於諸書異同稍有訂正而亦未一一精核也

孔門弟子傳略二卷

兩江總督採進本

明夏洪基撰其書合家語史記所載孔門弟子得八十八人卷首凡例稱家語弟子解止記姓名邑里而言行散見別卷史記雜撮經書語無倫次四書人物考及備考收錄羣書龐亂無紀是編各傳首敘聖賢教學次及行事終以評語於經史典確者大書列為正傳事瑣文異者小書附焉妄誕者雜

錄備覽其蒐擇頗勤然論語禮記之文人人習讀亦一字一句備錄不遺未免冗贅卷末附錄者九人為仲孫何忌仲孫說左丘明伯魚子思孟子顏涿聚公罔之裘序黜其辨仲孫說與南宮适為二人顏涿聚與顏雝由為二人論語左丘明與傳春秋者為一人皆為典核至公伯寮之列於弟子雖據史記然明代已罷其祀洪基仍濫載入則不免失考也

聖門志考略二卷

兩江總督採進本

欽定四庫全書

史部 傳記類存目一

不著撰人名氏惟書中自稱其名曰涓檜樹一條
後稱崇禎三年庚午春隨其大父登岱詣孔林祀
典一條後稱康熙八年以廷對留京則

國朝人也而考康熙庚戌進士題名碑是科無名涓
者殆貢生也其書雜鈔闕里諸志爲之殊不足以
資考證

闕里廣志二十卷

浙江汪啟淑家藏本

國朝宋際李慶高撰際字義修慶長字簡臣俱松江
人闕里志自前明陳鎬後屢有修輯皆蕪雜不足

觀康熙十二年際爲孔廟司樂慶長爲典籍相與
蒐求典故因舊志而增損之分圖像世家禮樂林
廟山川古蹟恩典弟子職官聖裔賢裔藝文十二
門所載於故實較詳然亦不能有所考訂也

三遷志十二卷

江蘇巡撫採進本

國朝孟衍泰王特選仲蘊錦同撰書成於康熙壬寅
以呂元善舊志歲久漶漫而

國朝尊崇之典及子孫世系林廟增修亦未纂錄成編
乃以次輯補分爲二十一門特選滕縣人蘊錦濟

甯人衍泰為孟子六十五代孫世襲五經博士

孟子生卒年月考一卷

江蘇巡撫採進本

國朝閻若璩撰若璩有古文尚書疏證已著錄是編博引諸書考孟子出處始末初辨孟子所生之鄒是邾非鄒次考來往梁齊滕宋之年月中閒旁及萬鎰百鎰之數與所以去齊不入燕之故而於生卒年月卒無的據案山堂肆考具載孔孟生卒謂孟子生於周定王三十七年四月二日卒於赧王二十六年正月十五日年八十四若璩獨不引之

蓋先儒詁經多不取雜書鄭元註禮記南風之詩不引尸子郭璞註爾雅西王母不引穆天子傳山海經皆義取謹嚴非其疎漏也

孔子年譜五卷

直隸總督採進本

國朝楊方晁撰方晁字東陽號鶴巢磁州人是書中三卷為年譜以天地人分紀之其前一卷曰卷首末一卷曰卷尾中間於史記世家歷聘紀年闕里舊志諸書頗有糾正然註太冗瑣又參以評語皆乖體例至卷首本祖庭廣記作麟吐玉書圖殊未

能免俗卷尾泛引雜史爲身後異蹟如魯人泛海
見先聖七十子遊於海上及唐韓滉爲子路轉生
諸事連篇語怪尤屬不經矣

至聖編年世紀二十四卷

江蘇巡撫
採進本

國朝李灼黃晟同編灼字松亭嘉定人晟字曉峯歙
縣人是書成於乾隆辛未一卷至十六卷爲至聖
年譜十七卷至二十四卷爲歷代至

國朝尊崇之典冠以灼所作孔子生日說孔門出妻
辨增祀孔璇論二篇其生日說謂公羊穀梁二傳

與史記所記差一年公穀記其懷妊之年司馬遷
記其誕生之年殊爲穿鑿自古及今未聞以懷妊
之年筆之於書者也至孔門出妻謂之記載舛誤
則可必謂庶氏之母爲庶子之母子思嫡長安得
謂之庶子乎書中辨野合之說病亦同此周道衰
微百氏橫議造作言語以誣聖者不可殫陳史遷
妄採張華誤述不過斷以一語斥諸名教之外耳
乃附會其詞以爲禱於尼山野宿懷孕故曰野合
是又愈鑿而愈舛矣

欽定四庫全書

洙泗源流

無卷數 編修 勵守謙家藏本

不著撰人名氏前有自序亦不署年月序稱所採始於堯舜以為洙泗之源終於顏會思孟為洙泗之流今考其書僅自唐虞訖孔門弟子二十餘人至子思而止未及孟子蓋不全之本前有錢曾二印一曰虞山錢曾遵王藏書一曰雒陽忠孝家篆刻拙惡朱色猶新蓋庸陋書賈所贗託也

右傳記類聖賢之屬三十二部二百三十一卷

內三部無

卷數皆附存目

案孔子稱伯夷叔齊為古之賢人孟子亦曰伯夷聖之清者也故孤竹之錄得入聖賢其餘非親炙鄒魯之堂者概不濫預焉蓋聖賢之名惟聖賢能論定之司馬遷敘仲尼弟子為列傳而七十子之門人不及焉孟子弟子亦不及焉慎之至也

別本晏子春秋六卷

內府藏本

舊本題齊晏嬰撰其書原本八卷已著於錄此本為烏程閔氏朱墨版以外篇所載已見內篇者悉

欽定四庫全書

史部 傳記類存目一

十九

移綴其文附於內篇各條之下與梅士享所刻管子同一竄亂古書然今代所行大抵此本恐久而迷其原第因附存其目以著其失焉

王文正公遺事一卷

浙江巡撫探進本

宋王素撰素字仲儀旦之幼子也舉進士官屯田員外郎歷工部尚書諡曰懿事蹟具宋史本傳是編所述旦事雖子孫揚詡之詞然大概與史傳相出入旦本賢相故也惟記真宗東封西祀之後令近臣編錄符瑞旦言兩為大祀使所奏符瑞一一

非臣目覩令堂吏取司天監刑中和狀稱有此瑞乞令編修官實錄臣奏不可漏落一事云云於事理殊為不近蓋旦於符瑞齋醮不能匡正論者有遺議焉故素以此陰解之非實錄也晁公武讀書志作四卷註稱凡五百條此本僅一卷蓋非完書然陳振孫書錄解題已稱一卷則南宋末已行此節本矣

韓魏公家傳二卷

江蘇巡撫探進本

不著撰人名氏記宋韓琦平生行事陳振孫書錄

解題以為是其家所傳晁公武讀書志則以為其子忠彥所撰錄公武去忠彥世近當有所據也其書隨年排次頗為繁冗公武引陳瓘之言謂魏公名德在人耳目如此豈假門生子姓之間區區自列其說當矣

韓魏公別錄三卷

浙江范懋柱家天一閣藏本

宋王巖叟撰巖叟字彥霖清平人鄉舉省試廷對皆第一調欒城簿歷樞密直學士簽書院事專蹟具宋史本傳巖叟嘗在韓琦幕府每與琦語輒退而書

之琦歿後乃次為別錄三篇上篇皆琦奏對之語中篇乃琦平日緒言下篇則雜記其所聞見也讀書志稱以國史考之歲月往往牴牾蓋失之誣其書讀書志作四卷書錄解題載有語錄一卷亦稱與別錄小異而實同別錄分四卷此總為一篇皆與此本三卷不合其為何時所併不可考矣

韓忠獻遺事一卷

內府藏本

宋強至撰至字幾聖錢塘人諸書不詳其始末此書結銜稱羣牧判官尚書職方員外郎以其祠部

集中詩文考之則登第之後謁選得泗州掾以薦
歷浦江東陽元城三縣令終於三司戶部判官尚
書祠部郎中其河北都運元給事書所謂四歷
州縣三任部屬者雖不盡可考參以此書所題尙
可見其大略也至嘗佐韓琦幕府故此編敘琦遺
事頗詳世所傳琦重陽詩不嫌老圃秋容淡且看
黃花晚節香句諸家詩話遞相援引其始表章者
實見於此編焉

豐清敏遺事一卷

浙江范懋柱家
天一閣藏本

宋李朴撰朴字先之興國人紹聖中進士官至國
子祭酒事蹟具宋史本傳是書編次其師禮部尙
書豐稷事蹟宋志著錄一卷與今本同末有紹熙
二年朱子後序并附墓誌本傳於後稷歷仕神宗
哲宗徽宗三朝屢著讜論時稱名臣朴所敘錄較
史傳爲詳書末又有稷註孟子三章幸學詩一首
及曾鞏所贈歌行袁桷祠記則明景泰中其十一
世孫河南參政慶所搜討增人也

种太尉傳一卷

浙江鄭大
節家藏本

史部 傳記類存目一

三

宋趙起換起字得君自稱河汾散人河汾地廣不知其里貫何所也其書專記龍驤四衛指揮使知延州种諤事蹟諤為世衡次子與兄古弟診號關中三种頗著威名宋史附載世衡傳後起所敘述較史加詳末云次其行事作种諤傳而此本前題种太尉傳考史不言諤官太尉此傳亦無此文蓋自唐以後武臣顯貴者往往加至太尉遂習為尊稱不必實居是職如李煜歸宋後祇為特進隴西郡公而徐鉉奉詔往謁乃語闡者稱願見太尉蓋

當時流俗有此等稱謂意其猶宋人舊題也史稱諤雖名將而喜事貪功實開永樂之釁今傳中無貶詞殆亦不無溢美矣

三蘇年表二卷

永樂大典本

宋孫汝聽撰陳振孫書錄解題載三蘇年表三卷右奉議郎孫汝聽編即此本也然永樂大典所載惟存蘇洵一卷蘇轍一卷蘇軾則別收王宗稷年譜而汝聽之本遂佚蓋當時編錄不出一手故去取互異如是今仍以三蘇年表著錄從其本名也

東坡年譜一卷 永樂大典本

宋王宗稷撰宗稷字伯言五羊人自記稱紹興庚申隨外祖守黃州到郡首訪東坡先生遺蹟甲子一周矣思諸家詩文皆有年譜獨此尙闕謹編次先生出處大略敘其歲月先後為年譜云云今刻於東坡集首者即此本也迨

國朝查慎行補註蘇詩於此譜多所駁正皆中其失蓋初始者難工踵事者易密固事理之自然耳

范文正年譜一卷補遺一卷附義莊規矩一卷 浙江巡撫採進

本

年譜一卷宋樓鑰撰鑰字大防鄞縣人隆興元年進士官至參知政事除資政殿大學士提舉萬壽觀卒諡宣獻事蹟具宋史本傳補遺一卷不知何人所作前有自識一條謂取舊譜所未載者見之各年之下所摭前譜闕遺頗多亦足以互相考證元天歷三年仲淹八世孫國儁與文正奏議同刊行之其義莊規矩一卷則仲淹嘗買田置義莊於蘇州以贍其族創立規矩刻之版榜後其法漸墮

治平中其子純仁知襄邑縣奏乞降指揮下本州許官司受理遂得不廢南渡後其五世孫左司諫之柔復爲整理續添規式其本爲范氏後人所錄凡皇祐二年仲淹初定規矩十條又熙甯元豐紹聖元祐崇甯大觀閒純仁兄弟續增規矩二十八條其慶元二年十二條則之柔所增定書中稱二相公者謂純仁三右丞者謂純禮五侍郎者謂純粹皆其子孫之詞也

綦崇禮年譜一卷

永樂大典本

宋綦煥撰煥崇禮孫也仕至通直郎知饒州德興縣主管勸農事是譜詳敘歷官而繫以所作詩文崇禮有北海集歲久散佚近始蒐永樂大典所載編次成帙此譜頗可考其著作年月之前後焉

呂忠穆公遺事一卷

永樂大典本

不著撰人名氏陳振孫書錄解題載之亦不云誰作所記呂頤浩言行每條必曰公於某事云云蓋其後人所述也

呂忠穆公年譜一卷

永樂大典本

欽定四庫全書

史部 傳記類存目一

三五

不著撰人名氏中頗載頤浩詩句與他家年譜體
例小異

涪陵紀善錄一卷

浙江巡撫
採進本

宋馮忠恕撰忠恕臨汝人紹興初官黔州節度判
官其父理師事伊川程子與尹焞爲同門友忠恕
又師事焞焞自金人圍洛脫身奔蜀紹興四年止
於涪時忠恕官峽中及遷黔州往來必過涪紹興
六年焞被召赴都明年忠恕以鞫獄來涪因細繹
舊聞輯而錄之以成此編忠恕之侍焞多在涪涪

爲程子謫居之地而是書之成又適在涪故以涪
陵紀善錄爲名前有忠恕自序宋史尹焞傳稱焞
言行見於涪陵紀善錄爲詳則修史時卽採此書
也

尹和靖年譜一卷

永樂大
典本

不著撰人名氏和靖尹焞諡也據書中稱謂蓋其
門人所編焞講學以存養爲先著述無多又立朝
不久亦無所表見故是譜所紀事蹟殊甚寥寥又
不及涪陵記善錄矣

周子年譜一卷

浙江鄭大節家藏本

宋度正撰正字周卿合州人紹熙元年進士官至禮部侍郎事蹟具宋史本傳是編乃嘉定十四年正官於蜀時所作自云於周子入蜀本末為最詳其他亦不能保其無所遺誤此本前有像贊後附行錄誌銘及宋史本傳蓋後人又有所增入非正原本矣明張元禎嘗與朱子年譜合刻之

二梅公年譜二卷

兩淮鹽政採進本

梅詢年譜一卷宋淳熙中陳天麟撰梅堯臣年譜

一卷元至元中張師曾撰二人皆籍宣城與梅氏為同里也明萬歷中梅一科合而刻之又於詢譜後載詩略一卷附錄一卷堯臣譜後載文集拾遺一卷附錄一卷

韓柳年譜八卷

編修汪如藻藏本

韓文類譜七卷宋魏仲舉撰仲舉建安人慶元中書賈也嘗刊韓集五百家註輯呂大防程俱洪興祖三家所撰譜記編為此書冠於集首柳子厚年譜一卷宋紹興中知柳州事王安禮撰亦附刊集

中近時祁門馬日璐得宋槧柳集殘帙其中年譜完好乃與韓譜合刻為一編總題此名云

朱子年譜一卷

江西巡撫採進本

宋袁仲晦撰案朱子年譜宋洪友成刻者為洪本閩省別刻者為閩本明李默刻者為李本此本前有朱子後裔懷慶序謂因各本不同乃訂正重刊然校以王懋竑本此本猶多漏略不能一一精核也

君臣相遇錄十卷

浙江汪啟淑家藏本

不著撰人名氏載宋韓琦事蹟考晁陳二家書目自今所傳韓魏公家傳韓魏公別錄韓忠獻遺事外尚有韓魏公語錄一卷又韓忠彥所撰辨欺錄一卷語錄即別錄之文而顛倒其先後惟卷末多一條辨欺錄為忠彥記其父嘉祐末命事與文富諸人辨今雖未見其本而書中大旨皆可考惟此書晁陳皆不著錄不知何人所作蓋南宋時其家子孫所為合辨欺錄別錄所載哀為一書觀書末載曾孫名十二人而無侂胄蓋諱而削之知其成

於開禧後矣

鄱陽遺事錄一卷

浙江巡撫
採進本

宋陳貽範撰貽範天台人初范仲淹嘗守鄱陽有善政饒人為之立祠紹聖乙亥貽範為通判因取仲淹在饒日所修創堂亭遺蹟及其游賞吟咏之地採而輯之以志遺愛自慶朔堂至長沙王廟記凡十有三目前有貽範自序

范文正遺蹟一卷

浙江巡撫
採進本

不著撰人名氏輯范仲淹生平遊歷自其出於吳中長於山東以及洛陽陝西睦池饒潤諸地為仕宦所經後人傳為遺蹟者採其名目其為一編間附以前人題咏碑刻至於西夏堡寨亦并載之中有文正書院等六圖為仲淹裔孫安崧所繪蓋亦其後人所編也

言行拾遺事錄四卷

編修程晉
芳家藏本

不著撰人名氏記范仲淹言行事蹟為行狀墓誌所未載者故曰拾遺大抵取諸實錄長編東都事略九朝通略諸書而說部之可採者亦附列焉其

第四卷所錄則仲淹子純祐純仁純體純粹四人

遺事也

道命錄十卷

內廷藏本

宋李心傳編心傳有丙子學易編已著錄是書載程子朱子進退始末備錄其褒贈貶謫薦舉彈劾之文宋史心傳本傳作五卷此本十卷與本傳不合考卷首元至順癸酉新安程榮秀序稱宋秀巖先生李公道命錄五卷刻梓在江州燬於兵榮秀嘗得而讀之疑其為初藁尙欲刪定而未成者齋

居之暇僭因原本略加釐定彙次為十卷如左云云然則此為榮秀所編非心傳之舊藁矣永樂大典載有心傳原本然所記惟程子事與此本前六卷相同者過半此本所有而永樂大典不載者凡二十八條永樂大典所有而此本不載者凡八條第七卷以下永樂大典全無之則榮秀大有所增刪并所記朱子諸條亦疑為榮秀所附益則所謂略加釐正者特諱不自居於改竄耳非其實也其大旨不出門戶之見其命名蓋以孔子比程朱然

於道命之義亦未得其解

御製詩序及識語已闢之至悉茲不具論焉

饒雙峯年譜一卷 永樂大典本

不著撰人名氏雙峯宋饒魯號也魯自稱從黃幹
李燔遊距朱子僅再傳當時重其淵源多相趨附
歷主講於東湖白鹿西澗安定諸書院故是譜所
記亦惟講學之事為詳案周密齊東野語深致不
滿於魯且稱其自詭為黃幹弟子疑以傳疑蓋莫
能明然亦不足深辨也

許魯齋考歲略一卷 永樂大典本

元耶律有尙撰有尙字伯強號迂齋東平人以伴
讀功授助教歷昭文館大學士諡文正事蹟具元
史本傳世祖時許衡除中書左丞固辭不受因上
奏取舊門生十二人為伴讀有尙其一也是編載
衡言行較史為詳然大端已具於史矣

劉文靖公遺事一卷 浙江范懋柱家天一閣藏本

元蘇天爵撰天爵有名臣事略已著錄是編乃所
述容城劉因行實也考天爵名臣事略第十五卷

卽紀因事然此卷所述皆事略所未言天爵於事
略既成之後別採舊聞補其所闕故命曰遺事元
史劉因本傳多採用此卷亦以後來搜輯較爲詳
備歟

辜君政績書二卷

永樂大典本

元陶凱撰凱字中元江都人以至正七年丁亥鄉
試榜授永豐教諭適永豐令辜中受代去縣之父
老子弟願以中善政刻諸石凱因序中政績爲此
書以贈言學記等篇附焉

思賢錄五卷續錄一卷

浙江范懋柱家天一閣藏本

元謝應芳撰應芳字子蘭武進人至正中薦授三
衢清獻書院山長阻兵不能赴明洪武中歸隱橫
山以終自號龜巢老人事蹟具明史儒林傳是編
爲其鄉宋寶文閣直學士鄒浩而作正錄成於至
正十五年分爲五目曰事實曰文辭曰祠墓曰祠
墓廢興曰古今題詠有楊惟楨鄭元祐二序續錄
則皆應芳及知府張度等祭墓之作成於明洪武
十二年其中又載有洪武十三年以後祭文碑記

諸篇迄於正統十年則後人所附八也

欽定四庫全書總目卷五十九

番禺陳起榮初校
南海潘繼李覆校

欽定四庫全書總目卷六十

史部十六

傳記類存目二

草廬年譜二卷附錄二卷

編修汪如藻家藏本

明危素撰素字太樸金溪人元至正中官至禮部尙

書參知政事翰林學士承旨出爲嶺北行省左丞

後退居房山淮王監國起爲承旨如故明洪武二

年授翰林侍講學士後因御史王著等論素不宜

列侍從謫居和州以卒事蹟具明史文苑傳初吳

澄孫當嘗編次其祖生平事蹟為年譜素為澄之門人因重加訂正刻於至正乙巳至明嘉靖甲寅澄裔孫朝禎復增入行狀神道碑列傳祭文一卷及歷代褒典奏議文移一卷鄒守益為之序即此本也

褒賢集五卷

浙江巡撫採進本

不題撰人名氏取宋元人著作有關范仲淹者及朝廷所降文牒等類合為一書一卷為傳碑銘祭文二卷為優崇典禮三四卷為碑記五卷為諸賢

贊頌論疏中間載至元順帝至正間則明初人所編也

滁陽王廟歲祀冊一卷

左都御史張若桂家藏本

不著撰人名氏明初追封郭子興為滁陽王立廟滁州令有司歲時奉祀此本前列洪武十五年敕諭一通具載祀典規條及守廟人戶次為太常寺丞張羽所撰滁陽王廟碑文蓋即從廟中碑刻鈔出別行者也

鐘鼎逸事一卷

浙江范懋柱家天一閣藏本

欽定四庫全書

史部 傳記類存目一

二

明李文秀撰文秀昆明人黔甯王沐英之闈豎也
是編皆紀英行事前列祠堂碑記三篇後為言行
拾遺錄十一條各為之論末附唐愚士贈文秀詩
一篇而冠以張統劉有年王汝玉王驥序四篇驥
序題洪武壬午汝玉序則書元年十二月而劓去
年號二字蓋汝玉作於革除以前而刻於革除以
後故削建文年號驥序作於燕王篡立以後故奉仍
稱洪武三十五年之詔耳闈寺之作本不足錄而
英本名臣文秀所錄尚與史傳相出入無詭詞夸

飾變亂是非之事故姑存其目焉

直道編八卷 兩江總督
採進本

明陳怡編怡吳縣人仕履未詳其祖祚字永錫
永樂辛卯進士授河南布政司參議坐事落職洪
熙初起為監察御史終於福建按察司僉事歷官
俱有直聲怡因輯其年譜行狀墓表輓詩之類以
成此書吳寬為題此名與明史祚本傳亦大致互
相出入案千頃堂書目載有孫堪直道編紀御史
陳祚事堪嘉靖中人今未見傳本其與此書為一

爲二莫之詳矣

翊運錄二卷

江蘇周厚培家藏本

明劉廌編廌誠意伯基之孫也是書成於永樂中集其祖父所得御書詔誥及行狀事實以爲此錄取誥文中開國翊運之語爲名同郡王景爲之序成化中巡按浙江御史戴用以版久漶漫因增輯重梓楊守陳爲之序嘉靖初從處州府知府潘潤之請以基九世孫瑜襲爵瑜因復增入襲封誥敕及部議題本謝恩表之類自爲後序二卷之首雜

八基表頌五篇頗爲不倫以序文考之卽瑜所增入蓋徒欲侈陳祖德爲闕閱之光而未知著述體例者也

崔清獻全錄十卷

兵部侍郎紀昀家藏本

明崔子璉編其書成於永樂中皆其五世祖與之遺事遺文也與之字正子廣州增城人紹熙四年進士理宗時累官廣東安撫使拜參知政事右丞相致仕卒諡清獻事蹟具宋史本傳與之所著有菊坡文集佚於兵火又有嶺海便民榜海上澄

金定四庫全書總目卷之十一
清錄二書皆記其當時政事後亦不傳僅存其言
行錄三卷奏劄詩文五卷子璉因哀為一編又以
理宗御劄及諸家詩文為附錄二卷其言行錄三
卷林鉞跋稱宋太社司令李公哀輯而不載其名
宋端儀序稱略為更定甘鏞跋又稱旁考史傳補
其脫略然則已非原本矣又蔣曾榮家別有寫本
分為二集內集二卷前卷為言行錄後卷為奏劄
詩文外集三卷上卷為所賜詔札中卷為宋史本
傳及續通鑑綱目諸書所記與之事下卷為題贈

詩文題其十世孫燿所重編成於嘉靖庚申前有
測引一篇稱重編先錄既成有謂不當以行先言
者有謂不當以臣先君者後見舊版篇次記號乃
知新本為後人剗改燿所重編實還其舊今觀其
書雖併十卷為五卷而序次略與子璉本合所謂
還其舊者確不誣也

陸右丞蹈海錄一卷 浙江鮑士恭家藏本

明丁元吉編元吉鎮江人是書成於成化中記宋
陸秀夫海上死難事蹟採宋史本傳及龔開所作

傳黃潛所作年譜益以諸家題咏彙爲一編竝載
秀夫遺文二首末附桑海遺錄序大忠祠碑及祭
文一首

張乖崖事文錄四卷

浙江范懋柱家
天一閣藏本

明顏端徐澣同編端應山人官成都縣教諭澣杭
州人官華陽縣教諭前有文安邢表序蓋宏治三
年表爲四川左布政使以張詠爲蜀名宦故屬二
人輯錄此編一卷爲本傳及事實二卷爲遺文十
二篇三卷四卷爲同時贈答及後人祠記祭文之

類詠全集尚有傳本端等未見故所輯頗挂漏焉

李衛公通纂四卷

直隸總督
採進本

明王承裕撰承裕字天宇三原人吏部尚書恕之
子宏治癸丑進士官至南京戶部尚書諡康僖事
蹟附見明史恕傳承裕與唐李靖爲同里故旣爲
建祠又纂其遺事爲此書明史藝文志著錄作四
卷此本凡史牒纂一卷遺作纂一卷文集纂一卷
存蹟纂一卷與明志合所載皆習見之文至李衛
公問對一書出自阮逸僞託而一概列入絕無辨

證可知其考訂之疎矣

陽明先生浮海傳一卷

浙江巡撫採進本

明陸相撰相字良弼餘姚人宏治癸丑進士官至長沙府知府是書專紀王守仁正德初謫龍場驛丞道經杭州為姦人謀害投水中因飄至龍宮得生還之事說頗詭誕不經論者謂守仁多智數慮劉瑾追害故棄衣冠偽託投江而實陰赴龍場故王世貞史乘考誤嘗力辨此事為不實而同時楊儀高坡異纂亦載此事與相所紀略同蓋文人之

好異久矣

朱子實紀十二卷

江蘇巡撫採進本

明戴銑編銑字寶之婺源人宏治丙辰進士官至給事中以疏彈太監高鳳下詔獄廷杖創甚而卒事蹟具明史本傳是書詳述朱子始末首曰道統源流世系源流次年譜次行狀本傳次廟宅次門人次褒典次讚述次紀題其書本因年譜而作其標曰實紀者銑自序稱謂之年譜則紹乎前彰乎後者不足談必曰實紀然後并包而無遺蓋年譜

主於明朱子學問之序出處之道而銑是書則主於以推崇褒贈誇耀世俗爲榮其立意本各有取也

韓祠錄三卷

浙江巡撫採進本

明葉性談倫同編性里籍未詳官潮州府同知倫上海人天順丁丑進士官至工部右侍郎然是編前有翰林院檢討盛端明序稱性編錄未成以述職北上倫時爲潮州知府因續成之考書成於正德甲戌上距天順丁丑已五十八年且作序之盛

端明爲宏治壬戌進士上距天順丁丑亦四十六年與倫似不相及卽倫老而尙存亦不應七八十歲尙爲知府後乃忽至九卿疑爲別一談倫名姓偶同也其書首載韓愈遺像及韓山書院鱷魚韓木諸圖次唐書本傳及愈謫潮州時所作詩文次記祠制祭儀及後人碑記詩讚末附載趙鼎得全書院記陸秀夫馬發祠記以皆在潮地故并錄之其南珠亭記一篇則又以潮之人物代興歸美於愈云

奕世增光錄八卷

浙江巡撫採進本

明王道行編道行字明南陽曲人嘉靖庚戌進士官至左布政使是為續五子之一明史文苑傳附見王世貞傳中是書乃其官常鎮兵備副使時為魏校所作也第一卷至五卷載敕命祭文以及同時諸人贈答書啟第六卷載校行狀誄詞及遺事七卷八卷則文彙備遺也因校誥敕中有永增奕世之光語遂以名其書焉

薛文清行實錄五卷

江蘇巡撫採進本

明王鴻撰鴻河津人官石灰山關稅大使薛瑄之曾孫壻也是編第一卷為瑄像贊行狀神道碑事實二卷為請從祀疏七篇三卷為祠堂書院諸記六篇祭文三篇四卷為讀書錄文集諸序四篇詩五首第五卷則雜錄柱聯之類而附以薛氏歷世科貢傳芳圖前有喬宇序作於正德辛未而奏疏有隆慶五年祭文有萬歷二十六年所記科貢有崇禎壬午癸未則瑄後人以次續入非鴻之舊也

商文毅公行實一卷

浙江范懋柱家天一閣藏本

欽定四庫全書總目卷六十一

史部 傳記類存目二

明商汝頤編汝頤商輅孫也以輅遺集兩燬於火
恐先德不傳乃哀為是書凡王獻所作行實一篇
尹直所作墓誌銘一篇楊子器所作神道碑一篇
未有正德十年汝頤自跋正德十六年刊版王子
言又為之跋

商文毅年譜四卷

兩淮馬裕
家藏本

明商振倫撰振倫輅之元孫也書前有小像八幅
自鄉試第一追官至謹身殿大學士皆圖畫之殊
未能免俗其言行錄一卷則輅孫汝泰所作振倫

并刊之也

傳信辨誤錄一卷

浙江吳玉
埤家藏本

明陳虞岳撰虞岳秦和人正統閒輔臣陳循五世
孫也土木之變循在內閣為首揆及景帝欲廢英
宗太子循依違不能匡正以此為當世所譏陳建
通紀載其事虞岳以為誣讟其祖乃作此書以辨
之首為諸名公敘略節略次為傳信六條一曰首
定儲宮之策一曰力沮南遷之議一曰計退德勝
之圍一曰密運回鑾之略一曰保護南宮苦忠一

曰請復南遷讜疏所引諸書惟力沮南遷一條弁山堂別集及叢記載有循名其五事則皆無確證次辨誣五條一曰辨不諍易儲之誤一曰辨徐有貞餽玉帶之誤一曰辨請治龔遂榮獄之誤一曰辨翰林用雜流之誤一曰辨申明制科之誤其意與孤兒籲天錄同亦孝子慈孫不得已之苦心也

夏忠靖遺事一卷

浙江范懋柱家天一閣藏本

明夏崇文撰崇文字廷章湘陰人成化戊戌進士官至南京太僕寺少卿蓋夏原吉之孫也是編追

述原吉歷官始末甚詳於世所傳慈感蚌珠事刪之不載體例頗為嚴謹然原吉治水功在東南其方略亦不備載殆以事具國史耶惟燕王篡立原吉稱臣此所謂范質生平惟欠周世宗一死者也而此云或執之以獻燕王是則子孫之詞矣

雲林遺事一卷

浙江巡撫採進本

明顧元慶撰元慶字大有號大石山人長洲人都穆之門人也此書皆紀倪瓚事蹟分高逸詩畫潔癖游寓飲食五門崇禎閒常熟毛晉別有刻本云

從天竺僧寮見之不著作者名氏較此本所載稍繁而此本後附贈詩及誌銘二首則毛本無之江甯李蘅嘗刻其本於所輯瓌探中題云顧元慶撰雖未知所據然考元慶所著尙有瘞鶴銘考夷白齋詩話蓋亦雅士蘇州府志載其兄弟皆織造治產惟元慶以圖書自娛王穉登往訪之年七十五猶酬對不倦是其志趣與瓌相近或輯此編以明所尙亦事理所有矣

旌孝錄一卷

浙江巡撫採進本

不著撰人名氏載成化十一年旌表朱灝孝行事考朱觀潛跋朱存理遺文後曰野航先生著述甚富自鐵網珊瑚世有刊本珊瑚木難好事傳鈔外祇購樓居雜誌一卷旌孝錄一卷并詩文數十篇云云則此編存理所輯也灝字景南長洲人卽存理之父親歿負土成墳廬於其側有馴烏之異詔旌其門存理字性甫博雅工文終於布衣

岳廟集四卷

編修汪如藻家藏本

舊本題明徐階編張庭校焦煜刊而首載階序稱

從黃山焦子請所輯武穆祠詩文讀之又云因不自量謀於五山張子而去取之則煜之初藁而階與庭爲之刪定庭序則云黃山子謂少湖子與庭曰盍校之我將刊焉因取汪氏所輯鈔本往復參校則初藁又非煜作矣大抵雜出眾手不可名以一人也原本凡傳一卷制一卷議序記一卷辭樂府詩一卷而附以岳武穆遺文一卷今以武穆遺文析出別入集部故此本以四卷著錄焉階字子升華亭人嘉靖癸未進士官至武英殿大學士諡

文貞事蹟具明史本傳庭自署曰眉山煜自署曰宛陵考太學進士題名碑嘉靖癸未科有張庭四川夾江人焦煜南直隸太平人皆階之同年當卽此二人至所謂汪氏者則不可考矣

吳疏山集十七卷

江南巡撫採進本

明吳悌撰悌字思誠疏山其別號也金谿人嘉靖壬辰進士官至兵部侍郎諡文莊事蹟具明史儒林傳其學出於王守仁然清苦剛介卓然不愧於儒者非姚江末流提唱心學恣爲橫議者比集止

三卷然據原跋則尚有贗作聶氏墓志胡氏表二篇竄入第四卷爲言行錄乃悌門人李約所編第五卷以下皆誥敕及表章頌美之文其後人屢屢重刊輾轉附益者蓋原本名紀實錄乃傳記之流體例不妨如是此本改題曰集遂使附錄之文至十四卷末大於本失其初編之旨矣今從崔與之集之例仍入之傳記類焉

胡梅林行實

無卷數 兩淮鹽政採進本

明胡桂奇編桂奇績溪人兵部尙書宗憲之子此

書卽紀宗憲行實梅林者宗憲別號也宗憲平倭之功載在史冊不容湮沒至其比附嚴嵩趙文華公論亦不可掩此書出其後人之手固未可據爲

徵信矣

忠烈編十卷

浙江范懋柱家天一閣藏本

明孫堪孫墀孫陞同編三人皆巡撫江西副都御史餘姚孫燧之子也燧遇宸濠之變抗節被戕堪等彙其制誥卷牘碑狀誌傳以及誄祭之文編爲此集曰忠烈者嘉靖初所贈諡也序爲嘉靖辛亥

嚴嵩撰其言不足為燧榮蓋其後人印行偶失刊

削耳

鄭端簡年譜七卷

浙江巡撫採進本

明鄭履淳撰履淳字叔初海鹽人嘉靖壬戌進士官至光祿寺少卿事蹟具明史本傳履淳為鄭曉之子故追述曉事以成此譜凡曉所作奏疏詩文皆一一附載其中如鹽政壞於折色及海鹽官軍宐掣回衛所操練諸疏頗足補史志所未備然冗漫亦由於此末附祭文誥諭卹典墓志行略之類

於譜例已為複出又以履淳所作思親詩文附鐫於末多至三卷於體裁尤不協矣

董子故里志六卷

兩江總督採進本

明李廷寶撰廷寶字國用號澮溪曲沃人嘉靖中官景州知州考漢書稱董仲舒廣川人而廣川地大今山東德州直隸景州棗強縣皆其故地故三邑皆祀董子皆有董子故蹟其作志書皆自以董子為鄉人德州斥景州之牽引景州斥德州之附會棗強又出而斥二州之影佔數百年來喧如聚

訟迄今未有所歸廷寶官於景州故據廣川里名
定仲舒爲景州人而所載馬偉董子辨一篇又以
董學村割隸故城欲引之以爲故城重夫惠跖兄
弟不以惠而寬跖向歆父子不以向而榮歆況夫
前代鄉賢何關後人之事郡邑志乘錮習相仍紛
紛爲無益之爭皆其所見之小也

濂溪志九卷

兩淮馬裕
家藏本

明李楨撰楨字維卿安化人隆慶辛未進士官至
南京刑部尙書事蹟具明史本傳是編雖以濂溪

爲名似乎地志實則述周子之事實首載太極圖
說通書次墓志及諸儒議論歷代褒崇之典次古
今紀述次古今題詠竝祭告之文

濂溪志十三卷

河南巡撫
採進本

明李崧慈撰崧慈字元穎龍城人官道州知州是
編因李楨舊志稍爲緝補無所考證闡明

東方類語十六卷

浙江巡撫
採進本

明朱維陞撰維陞海鹽人其書皆類聚漢東方朔
事蹟自列傳別傳外傳以及瑣語神異經十洲記

欽定四庫全書

史部 傳記類存目二

六

諸書無不採撮創立十目分爲內外二篇內篇記其常事外篇則涉神仙家言其條例內辨史記東郭先生爲臨淄人與東方朔之爲厭次人地各不同自來引用多誤亦稍有考核然其徵引猥雜究不能出小說之門徑不足據也

二程年譜二卷

安徽巡撫採進本

明唐伯元撰

國朝黃中訂補伯元字仁卿澄海人萬歷甲戌進士官至南京吏部文選司郎中事蹟具明史儒林傳

中字平子號雲瀑舒城人考二程遺書有伊川年譜而無明道年譜宋文鑑所載明道墓志朱子又偶未見故別爲之行狀此書取明道行狀改爲年譜又取伊川年譜小變其體例均無所考正僅因襲舊文而已

涑水司馬氏源流集略八卷

浙江巡撫採進本

明司馬晰編晰字宗晦夏縣人萬歷癸卯舉人宋司馬光十七世孫也卷首自序云自先文正公居於河洛竊於鳴條而曾孫開國公扈遷東粵家於

會稽南北相距殆四千里代次相承凡十餘世於是北人以涑水氏爲無後南人以山陰氏爲失祖是編所輯先之以行事系籍之實繼之以制誥圖跋之傳終之以紀述標題之富其意蓋將搜採以備家乘而第八卷中有積德之什乃載晰由山陰復歸於夏縣萬歷癸卯鄉試第一里人贈賀之作是又蔓延附載不出譜牒之窠臼矣

武侯全書二十卷

江西巡撫探進本

明王士騏撰士騏有馭倭錄已著錄是編述諸葛

亮始末首三國志本傳次張枻補傳次鼎立繼統連吳南征北伐遺命調御法簡八篇以補張傳次心書次新書次陣圖次篇翰次世系次朱子綱目又附錄後人評論詩賦雜文三卷終焉按陳壽進諸葛氏集表云刪除重複隨類相從凡爲二十四篇具列其目於傳後今其書久不可見是書搜羅完備而心書新書之類真僞蕪雜未能刪汰諸篇分隸亦或未當後楊士偉因士騏此本別改定爲諸葛書較爲精核以創始者爲士騏故仍存其目

焉

米襄陽外紀十二卷

江蘇巡撫採進本

明范明泰撰明泰字長康嘉興人萬曆庚子舉人是編紀米芾遺事分恩遇顛絕潔癖嗜好塵談書學畫學譽羨書評雜記考據十二門多不著出典未足依據亦時有舛譌如恩遇第一條云皇祐二年詔米芾以黃庭小楷作千字文考芾生於皇祐三年辛卯則所稱寫千字文在生前一年矣有是理乎

米芾志林十六卷

江西巡撫採進本

亦題明范明泰撰與襄陽外紀竝同惟後附刻襄陽遺集一卷為明泰所輯蓋未見寶晉英光集故有是刻又海岳名言寶章待訪錄研史各一卷則皆芾之遺書然書史畫史竟不編入亦殊疎漏矣

精忠類編八卷

左都御史張若淮家藏本

明徐縉芳撰縉芳字奕開晉江人萬曆辛丑進士官至監察御史事蹟附見明史劉策傳是編輯錄宋岳飛事實藝文首為表類紀姓氏世系之屬次

欽定四庫全書總目卷六十一

史部 傳記類存目二

十九

爲傳類記生平始末次爲遺翰類皆飛詩文次爲
宸綸類皆高宗所賜載於金陀粹編者次爲褒贈
類皆歷代制誥案牘次爲家集類皆岳珂之文有
關於飛者次異感類紀諸靈應次詩類文類則皆
後人題述之作也編次頗無條理而異感類中如
瘋魔行者罵秦檜胡迪入冥之類尤類傳奇演義
飛之忠烈自與日月爭光不假此委巷之談侈神
怪以相耀也

薛文清年譜一卷

江蘇巡撫
探進本

舊本題明楊鶴撰鶴字脩齡武陵人萬歷甲辰進
士官至兵部尙書總督陝西三邊軍務事蹟具明
史本傳考是書後有鶴自跋稱本薛瑄門人張鼎
所編歲久版佚瑄八代孫士宏偶以舊本示滿朝
薦及鶴朝薦屬鶴訂定鶴因命其子嗣昌重以瑄
集考正年月竝採集中詩文佚事補之然則此本
雖題鶴名實出嗣昌手耳嗣昌字文弱萬歷庚戌
進士官至東閣大學士事蹟具明史本傳

蘇米譚史一卷蘇米譚史廣六卷

江蘇周厚
堉家藏本

欽定四庫全書總目卷六十一

史部 傳記類存目二

二十

明郭化撰化字肩吾宣城人始末未詳譚史序題
辛亥蓋萬歷三十九年也是編雜採蘇軾米芾軼
事可資談柄者各為一卷又廣蘇軾事為四卷米
芾事為二卷皆摭拾小說無他異聞又皆不著所
出彌難依據

海珠小志五卷

兩淮馬裕
家藏本

明李韓撰韓番禺人萬歷中官至武定府知府宋
龍圖閣待制吏部侍郎李昂英之裔也廣州城外
珠江有海珠石屹立水中昂英常讀書其地捐資

初寺曰慈度後人即寺祠焉明萬歷中韓因考尋
古迹輯為此志凡四卷

國朝康熙丁丑其後人文焰重加校刻增以近人諸
作共為五卷前一卷載圖像諸記行實祭文後四
卷則遊覽謁祠詩詞也

襄陽外編

無卷數 浙江
巡撫採進本

明顧道洪編道洪字嗣圖無錫人是編作於萬歷
中首繪孟浩然像竝錄採史書本傳暨諸家贈荅
題詠之作復以古今詩話附列於後所採上起於

唐下迄乎明然王士元浩然集序近在耳目之前
乃反佚之何也

程朱闕里志八卷

兩淮馬裕家藏本

明趙滂編滂歙縣人是書前有高攀龍序則成於
萬歷中也大旨謂朱子系出新安二程祖墓亦在
焉故合志之分為七門案闕里乃孔子里名非推
尊之號宋咸淳五年詔婺源祠所稱文公闕里已
為失實今程子亦稱闕里則尤承譌踵謬習焉而
不察者也

考亭朱氏文獻全譜十二卷

浙江巡撫採進本

明朱鍾文撰鍾文字吾滄朱子十二世孫官大足
縣知縣新安朱氏支派非一其北洛墩頭之朱本
不出於考亭時方醵金購譜建祠鍾文恐其亂宗
乃溯唐茶院公以來世次纂紀本末搜討頗詳分
類凡十三門曰廣睦曰明宗曰溯本曰尊祖曰著
居曰庭訓曰褒典曰彙文曰列傳曰宦達曰女德
曰外戚曰雜紀冠以朱子所作世譜原序

溫公年譜六卷

江西巡撫採進本

欽定四庫全書總目卷二十

史部 傳記類存目二

明馬巒撰巒字子端夏縣人與司馬光爲同里以光舊無年譜因撰此編以補史傳所不及其大指以光行狀爲主參以史傳及名臣言行錄證以光所著傳家集其餘詩話小說皆詳爲考訂分年編載其不可專屬一年者則總爲附錄於末焉

梅墟先生別錄二卷

兩淮鹽政探進本

明李日華鄭琰同撰日華字君實號竹懶嘉興人萬歷壬辰進士官至太僕寺少卿明史文苑傳附載王維儉傳中琰字翰卿自稱閩人其始末未詳

是編爲嘉興周履靖而作履靖字逸之能詩好事與其妻桑貞白自相唱和多刊書籍以行夷門廣牘卽其所編蓋亦趙宦光陳繼儒之流明季所謂山人者也上卷爲日華所撰載其生平甚悉下卷爲琰所撰亦略具事實而錄其詩中摘句尤多

蘇米志林三卷

內府藏本

明毛晉撰晉有毛詩陸疏廣要已著錄是書掇蘇軾瑣言碎事集中所遺者編爲二卷又以米芾軼聞編爲一卷大概與蘇米譚史互相出入

顧端文年譜二卷

浙江巡撫採進本

明顧與沐編八

國朝後其孫涇曾孫貞觀相續成之與沐無錫人顧憲成之子由舉人官至夔州府知府涇亦舉人貞觀官中書舍人其書前冠以崇禎二年諭祭文及誌銘行狀復附憲成沒後奏請贈諡諸疏於原文皆刪節存略視他家較簡核有體

張抱初年譜一卷

江西巡撫採進本

明馮奮庸撰奮庸字則中壽安人師事澠池張信

民因紀其生平事蹟為年譜信民字孚若號抱初

澠池人由鄉貢官懷仁縣知縣

關帝紀定本四卷

兩江總督採進本

明戴光啟邵潛同編光啟字方廷潛字潛夫皆江都人初元至大閒胡琦曾輯關帝事蹟成書明宏治嘉靖天啟閒吳濬呂柟薛三省諸人皆有纂錄光啟潛因諸家之本刪補以成此編首世系次年譜次封號次誥命次實錄次遺蹟次論辨頌贊次奏疏碑記次詩次祭文次靈異刻於崇禎戊辰姚

希孟爲之序

心齋類編二卷

兩江總督
採進本

明王元鼎編元鼎泰州人王良之後書中綸音首
簡廟謨首錄二跋自稱良之元孫彙選標題跋又
自稱良之曾孫刊版必有一譌也是書紀崇禎四
年良從祀

孔廟始末上卷爲奏疏類篇錄嘉靖閒巡撫劉節御
史吳悌薦良二疏并諸廷臣請從祀三疏請諡一
疏下卷爲別傳類編錄萬歷辛丑翰林館課以王

良傳命題諸詞臣所擬傳十六篇上卷之前冠以
崇禎三年諭旨一道題曰綸音首簡又載崇禎辛
未會試策題一道問明從祀文廟諸人數及良名
者題曰廟謨首錄而以鄉紳揭帖尺牘附卷末又
列諸家著述之有涉於良者曰彙選標題列公私
祠祀及良者曰禮祀類紀元鼎聞邸報志喜詩四
首亦編其中體例頗爲繁碎考明史儒林傳以良
附王畿傳中紀其終始甚詳然不載有從祀

孔廟事今兩廡俎豆亦無良位不知元鼎何以有此

書也

邵康節外紀四卷

兩江總督
採進本

明陳繼儒編繼儒字仲醇號眉公華亭人事蹟具
明史隱逸傳是編取邵伯溫聞見錄所載邵子
事蹟略為詮次始末竝其自稱伯溫及稱康節先
公諸字亦未刊削殆不免葛龔作奏之誚又附載
伯溫易學辨惑與查顏散先天方圖圖說余孟宣
經世要旨及家傳心易數序三篇而終以邵子及
伯溫本傳繼儒號為隱君其作此書殆以自寓然

伯溫之錄具在何必復述其文也

遜志齋外紀二卷續集二卷

安徽巡撫
採進本

明姚履旋撰履旋上元人是編採諸書所紀方孝
孺殉難後事及文移案牘之屬彙為一編其分十
類曰表揚曰像贊曰傳銘日記狀曰賜言曰贈遺
曰碑記曰祭弔曰復姓曰祠典其復姓一類載孝
孺幼子德宗冒姓余氏及歸宗建祠事頗具始末
其書成於崇禎中後有續集一卷則

國朝康熙中婁縣訓導徽州項亮臣所補輯也

周元公集十卷

編修朱筠
家藏本

明周沈珂編沈珂吳縣人周子裔也是集卷一為
圖像卷二為世系年譜卷三為遺書卷四為雜著
卷五為諸儒議論卷六為事狀卷七為褒崇優卹
卷八為祠墓諸記卷九卷十皆附錄後人詩文雖
以集為名實則周子手著僅五之一今人之傳記
類中從其實也

周氏遺芳集五卷

編修朱筠
家藏本

明周沈珂及其子之翰編先是周子十七世孫與

爵輯其先世著述事蹟自周子四世孫興裔以下
為遺芳集凡歷代褒崇詔諭及傳誌記序諸作以
次附焉沈珂父子重為編次而與爵以下則仍無
所增益

靈衛廟志一卷

兩淮馬裕
家藏本

明夏賓撰賓始末未詳宋建炎三年金兵攻臨安
守臣康允之棄城走錢塘令朱蹕偕縣尉金勝祝
威率民兵力戰死之杭人賴其捍禦得乘隙以逃
為立祠於死所是書以建廟封侯本末竝祀典碑

記彙爲一編見有功必報之禮亦風起忠烈之志也

靡略二卷

浙江巡撫探進本

明陳念先撰念先慈谿人其八世祖敬宗字光世永樂甲申進士宣德間由司業陞祭酒官南靡者二十年嚴重有師法與北靡祭酒李時勉齊名世稱南陳北李念先於崇禎末至南靡搜輯靡志所載參以年譜文集編年紀錄以成是書蓋惟備敬宗一人居官之始末非紀南靡事也

宋四家外紀四十九卷

內府藏本

不著編輯者名氏四家者蔡襄蘇軾黃庭堅米芾也蔡紀成於徐勣蘇紀成於王世貞黃紀成於陳之伸米紀成於范明泰本各自爲書此本蓋明季坊賈所合刻也

羅江東外紀三卷

兩淮鹽政探進本

國朝閔元衢撰元衢字康侯烏程人自號歐餘生自以終身不第有似羅隱故作此書蓋一時寓意之作也

金定四庫全書總目卷之二
賀監紀略四卷 兩淮鹽政
採進本

國朝聞性善暨其弟性道同編性善字與同性道字
天迺甯波人其書備摭賀知章遺文軼事及唱酬
題詠之詞彙爲一編采擷頗富然如唐明皇帝送
知章詩有二本方回瀛奎律髓具載朱子之說又
韋穀才調集所載楊柳枝詞標題誤增枝字遂以
天寶以前之絕句爲長慶以後之樂府皆未考定
則亦多疎舛矣徵引古書每事必造一標題尤類
小說體例也

姑山事錄八卷

浙江巡撫
採進本

國朝吳肅公杜名齊同撰肅公有詩問已著錄名齊
始末未詳是編述明末沈壽民事實壽民字眉生
宣城人崇禎中巡撫張國維以賢良方正薦徵赴
闕下抗疏劾楊嗣昌奪情誤國熊文燦不能制敵
之罪疏奏畱中不報遂歸隱姑山肅公名齊皆其
門人因作此書以記其出處卷一卽劾楊嗣昌熊
文燦疏及荅薦辟書數篇卷二以下皆撫按薦疏
公揭及同時友人來往書啟而終以投贈篇什福

王時壽民又為馬阮所惡幾遭毒手別有書記其事曰甲乙存略見肅公所作凡例中今未見傳本其存佚不可知矣

謝臯羽年譜一卷 兩淮鹽政採進本

國朝徐沁撰沁字楚公會稽人嘗刊謝翱晞髮集因

復搜採遺事為作是譜中間如扎木楊喇勒智 原作

楊輦真加今改正發宋陵事以元世祖本紀參核當在至

元戊寅不當在乙酉沁則據周密癸辛雜識定為

乙酉黃宗羲為作序頗疑其非又姜夔乞正雅樂

在甯宗慶元閒而譜以為理宗時亦沁之誤也

甯海將軍固山貝子保越平閩實績一卷 內府藏本

不著撰人名氏所紀乃惠獻貝子富喇塔奉

命討逆藩耿精忠統兵在溫州擊賊及暫回處州之事起

康熙十五年二月十四日迄六月初九日按日記

載蓋即取甯海將軍行營塘報湊集成帙故詞句

多不雅馴且所錄僅四月之事首尾亦未完具

保台實績錄一卷 內府藏本

不著撰人名氏紀台州兵巡道楊應魁政績應魁

字斗垣射洪人以兵部郎出巡台州適聞逆耿精忠遣兵犯關回台州應魁從貝子富喇塔駐台拊循兵民條畫守禦頗著惠愛故郡人作此以志其功自固根本至修庶政其分二十目目各為一篇云

楊公政績記一卷

編修程晉芳家藏本

國朝黃家遴撰家遴奉天人官至嘉興府知府是編述明楊繼宗遺事繼宗字承芳陽城人天順初進士由刑部主事歷官雲南巡撫僉都御史家遴以

繼宗曾任嘉興府知府號為循吏因哀其事蹟以成此書末附繼宗本傳一篇較明史列傳為詳然不及載其追諡亦不知傳出誰手也豈即家遴所作歟

楊文靖年譜二卷

浙江吳玉墀家藏本

國朝張夏編夏有雒閩源流錄已著錄是編以楊時年譜舊本詳略失宜乃參稽史冊語錄文集訂為上下二卷考宋史時本傳稱時安於州縣未嘗求聞達而德望日隆有為蔡京謀者以為事勢必敗

宣引舊德老成置諸左右庶猶可幾及蔡京然之
乃薦爲祕書郎此編於七十一歲書宣和五年癸
亥四月有旨召赴都堂審察以疾辭其下分註雖
略及張翬語而歸其事於高麗王問時安在副使
傅墨卿以聞故有是召於七十二歲書六年甲辰
十月召爲祕書郎仍令上殿十二月至京師入對
其下分註又以高麗使臣將至傅墨卿再薦於朝
爲詞竝註曰是時蔡京已斥若欲泯蔡氏薦辟之
蹟者然時赴蔡氏之薦朱子語錄亦深言其失自

非聖人孰無過舉原不以是沒其生平也夏以東
林託始之故曲爲文飾仍不免門戶之見矣

忠武誌八卷

江西巡撫
採進本

國朝張鵬翮撰鵬翮字運青遂甯人康熙庚戌進士
官至大學士諡文端是編載漢諸葛亮始末首本
傳次年表次世系次心書次新書次遺文次遺制
次遺事次用人次勝蹟次爲後人詩文其遺文不
收黃陵廟記之類頗有甄別而心書新書確爲僞
託乃竝載之則仍蕪雜也旣收心書新書姑存其

舊而十六策仍不載則又疎漏也梁甫吟詞意雖
淺然見於歐陽詢藝文類聚其來已久又增一白
鳩篇則不知其何來矣

周忠介公遺事

無卷數 兩江
總督採進本

國朝彭定求撰定求字訪濂長洲人康熙丙辰進士
第一官至翰林院侍講是書述周順昌忤璫被逮
本末首載順昌歷官敕誥次載順昌子茂蘭鳴冤
請祠諡二疏末載書傳碑記并茂蘭傳兼附朱祖
文及顏佩章等五人傳於後定求皆為之跋

別本朱子年譜二卷附錄一卷

安徽巡撫
採進本

國朝黃中撰是編刻於康熙戊午冠以畫像世系題
名錄別錄附以慶元黨籍呂祖泰書及歷代褒典
其別錄惟載朱子言行七條不知其去取之意與
編次之例安在又以朱子名字號諡夾註於末益
不可解年譜中多附以議論大旨主於頌美無所
考證其附錄之序謂程朱之顯晦關宗社之存亡
中以李德裕論耶正一條列於真德秀之後張浚
之前似不知德裕為唐人也

王文成集傳本二卷

浙江巡撫採進本

國朝毛奇齡撰奇齡有仲氏易已著錄王守仁之闢宋儒與奇齡合又餘姚蕭山為同郡有鄉黨諒故奇齡特為守仁作傳上諸史館後佚其半奇齡子遠宗又摭拾足之傳中凡低一格者皆附錄雜事其標附字者則辨論考證之詞也未附門人名籍與襲爵始末夫史傳非講學之書守仁一代偉人亦不必以講學始重奇齡提唱良知曉曉不已不免門戶之見其辨諸附會標榜之事以為文成元

妄起於門人及諸記述則至言也

梅里志四卷

江蘇巡撫採進本

國朝吳存禮撰存禮奉天人官至江南巡撫考史記吳世家張守節正義稱泰伯居梅里在常州無錫縣東南存禮以吳氏出自泰伯因為是書以述其

祖德

朱子年譜六卷

副都御史黃登賢家藏本

國朝朱世潤編世潤朱子十八世孫襲翰林院五經博士朱子年譜舊本明戴銑增之為實紀李默修

之復稱年譜

國朝又有洪去蕪本王懋竑本諸家之中惟懋竑本最精核他家皆不免疎舛是編意主鋪張不求考核故未免踵譌襲謬至於李公晦敘述朱子生平數萬言見性理大全洪本有之新聞本王本所載則更多於大全蓋即其所作言行錄也今乃載魏序而不載李書又朱子五十六歲辨陸學之非辨陳學之非舊譜有之惟李默本刪去以默傳金谿之學故也此從李本亦似非朱子之意且以年譜

爲名而年譜僅居第三卷自第四卷爲行狀外其餘褒崇題詠之類乃占前後四卷末大於本於體例亦未協也

陸象山年譜二卷

江西巡撫探進本

國朝李紱撰紱字巨來號穆堂臨川人康熙己丑進士官至內閣學士兼禮部侍郎陸九淵年譜爲其門人袁燮傅子雲同編寶祐四年李子愿又重輯之劉林爲刊版于衡陽紱病陸氏家祠所刻凡文與本集重見者多所刊削又病其不載陸九齡陸

九韶事蹟乃重加補輯定爲此本大旨申王守仁

朱子晚年定論之說

考訂朱子世家一卷

安徽巡撫採進本

國朝江永撰永有周禮疑義舉要已著錄永家婺源與朱子同里故取年譜舊本重加刪訂各附考證而終以婺源子孫承襲博士支派後附天甯寺會講辨一篇專論學會錄所載慶元丙辰朱子至新安會講天甯寺事爲明季良知之徒鑿空撰出以厚誣朱子云

左忠毅年譜二卷

江西巡撫採進本

國朝左宰編宰桐城人左光斗之曾孫也光斗事蹟具載明史本傳乾隆己未宰復網羅散失參以祖父傳聞旁及文集所載與同難諸人所述以補成此譜於當日情事始末較爲詳備

胡忠烈遺事四卷

江西巡撫採進本

國朝史珥編珥鄱陽人乾隆甲戌進士官吏部主事是編紀建文末大理寺少卿胡閏遺事與後人題詠詩文而閏女郡姐及連坐親屬竝載焉珥十一

世祖秉方爲閨之壻閨旣死節壻家亦連坐故珥
述其殉節始末成此書先是紀閨事者有英風紀
異史桂芳所刊而楊際會名之者也又有風忠錄
瞿鳳翥所刊而文德翼序之者也有忠義類編
史乘古所名其例言則屠叔方所纂者也珥彙合
諸書考證頗詳如閨妻汪氏非方氏貞姑傳中所
云王安人者乃史氏之婦非閨妻頗有糾譌訂舛
之功惟舊錄載萬歷十二年十月八日詔雪革除
諸臣張榜於縣門忽風掣其榜八雲中飛舞空中

自午至申乃墮故有風烈英風諸名紀其實也而
史桂芳所作詩序乃謂閨之風異放而往周流六
虛卷而還收攝完聚明明有聖學景象區區以忠
臣目之恐不足以慰在天之靈云其說似高而實
謬文天祥不云乎孔曰成仁孟曰取義讀聖賢書
所學何事其言至爲明白奈何以忠臣爲區區而
曰別有聖賢乎

朱子文公傳道經世言行錄八卷

浙江巡撫
採進本

國朝舒敬亭撰敬亭字孝徵銅山人是書取朱子言

行彙爲一編前有朱子小像及父師題辭又有自題贊及諸人先後題贊卷一卷二爲年譜行狀卷三爲道學淵源其中濂溪事實記蓋取之文公文集明道行實則取之二程文集卷四爲伊川行狀及道體卷五爲學存養克己卷六教人儆戒卷七觀聖賢辨異端卷八治道皆取之文集近思錄而以讀書志不自棄文終焉皆鈔撮習見之文於朱子之學不能有所發明也

曹江孝女廟志十卷

浙江江陰曹淑家藏本

國朝沈志禮撰志禮字範先會稽人官至廣東按察使是編紀孝女曹娥事實其自序謂有同里印文學君素初編張明經疆續纂俱未成志禮乃因舊志重輯孝女事在漢順帝漢安二年見於邯鄲滄所撰碑今法帖所傳本與此志互有同異可以相證後二卷附志宋英宗時孝女朱娥與明初孝女諸娥事二女亦皆以身救其親又皆與曹娥同里故以配食於廟并錄其傳志歌詠之文於後焉

右傳記類名人之屬一百五部四百九十四卷

內三部無

卷
數皆附存目

欽定四庫全書總目卷六十

番禺陳起榮初校
南海潘繼李覆校

志... 卷六十... 番禺陳起榮初校... 南海潘繼李覆校... 欽定四庫全書總目卷六十

第
五